



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim




tir yimyim

TAPAK 3

Man United nungi asayar Jack Fletcher nem tenokdangba agütsü

Iran tongti lenir Khamenei tepsetba Omar Abdullah-i aitsür



VOL. XXIII ISSUE NO. 141 (ADOK 141) DIMAPUR YANGTEPNÜ (THURSDAY) METSÜREMI (MARCH) 05, 2026 ₹ 5.00

Tir Yim küm 25 jungogo



Dimapur, Metsüremi/March 04 (TYO): Chümoukedima district kübok Tir Yim küm 25 ajungba benjongmung sentong ka yimtsüing community cum multi-purpose hall nung Bodhbarnü agia liasü.

Iba yimtsüing ya 2001 küm iba mapang Nagaland indang Chief Minister inyaka alisang Dr. S.C Jamir-i semzükja liasü aser 2017 küm state sorkari recognition agütsü.

Sentong akhumdong ka ama Speaker, Nagaland Legislative Assembly, Sharingain Longkumer-i jembidang iba yimtsüing nung alirtem dang mezüingpur mangdang akumtsübo alitsü ayongzük aser jubilee ya benjong ka amungba kisüing masü saka tesüiba mapang bilemteta tarutsü asoshi sentong yangluba tongtipang mapang ka lir ta ashi.

Alima kanga kera melenshia aor asünung, nüburtemi state sorkari teyari kisüing nung metaloka melie pei sasa pei poksünga aliba yimya amshitsüla, ta pai ashi. Pai parnok dang pei aliba tesem terenlok atema mangdang ayutsü

aser mapa inyak tenzüktsü ayongzük liasü.

Tir Yim tarutsü nükla nung rangloker master plan ka nüngdaker, aser ibaji village council-i anir inyaksüla, aser nia yaritsü, ta Longkumer-i ashi.

Taoba mapang Chief Minister aser Governor inyaka alisang Dr. S.C. Jamir-i jubilee ya tesüiba küm 25 bulemtetba aser tarutsü asoshi sentong yangluba mapang ka lir, ta ashi.

Alima kanga kera melenshia aoba mapang ka nung nüburtemi akhi alemli yimya kisüing nung metaloka malitsüla, saka modern development asangsang nung amshitsüla, ta pai ashi.

Pai lanurtem dang tarutsü tia tashi ita alitsü atem tejakleni aotsü asoshi bilemba yimya amshitsüla, ta ashi.

Iba sentong nung Director, Soil & Water Conservation, L.Chubaonen Longkumer-i jubilee nüngou kaket sayaja liasü.

Ungma Village Council, Ao Senso Telongjem Dimapur, Ungma Senso Telongjem Dimapur aser Tir Yim Village Council nungia iba sentong nung o tatsütsü jembia liasü.

US submarine-i tzüyim telungi yokba Iranian rong nungi tasü mang 87 ngutetogo

Galle, Metsüremi/March 04 (Agencies): US submarine ka nungi torpedo khalokja Iranian warship ka Sri Lanka tzükum anasa tzüyim telungi yokba nungi nisung tasü mang 87 ngutetogo aser nisung 32 takum kumzükogo, ta Sri Lanka Navy ajanga Bodhbarnü ashi.

Indian Ocean nung tzüyim telungi yokba Iran nunger rong ya Islamic Republic indang "prize ship" liasü, ta US Defense Secretary Pete Hegseth-i ashi. World War II sülen rong ka submarine kati tzüyim telung leni yokba otsü aikabo mali.

IRIS Dena tzüyim telungi yokba ajanga US aser Israel mitkari Iran mitkar anema par arütsü alema oa inyaksangshiba sayur. US Tir Donald Trump-i iba rara nung tongtipang nükjidong kaji Iran indang Navy samatsütsü ya lir ta shia lir.

"International waters nung kecha masütsü ta bilema aliba Iranian warship ka American

submarine ajanga tzüyim telungi yokogo. Iba ya torpedo ka ajanga lir," ta Hegseth-i Pentagon nung osangbener dang ashi.

Sri Lanka indang Foreign Minister Vijitha Herath-i Parliament dang, nisung 180 mena aliba IRIS Dena ya timtem nung lir aser tzüyim telungi lutar ta asen navy temi osang angazük, ta ashi. Sorkari rescue mission atema rong aser tayimtsütem yok, ta pai ashi.

Navy odongtar Commander Buddhika Sampath-i ashiba agi, navy rong tem iba tesem tonga aodang, rong timtem nung aliba yimya kecha mongutet aser totzü inshiba aser lift rafts dang kar liasü. Onoki nisung kar tzüma nung pongdaka aliba angu.

Nisung 32 takum kumzükba ya Sri Lanka south tsütsü Galle yimti nung aliba mozüki kati anir ao. Tasü mang tem ali bushia bener aruogo, ta pai ashi.

Galle nung aliba National Hospital nung Iran nunger rong ketdangsürtem tasü mang trucks nung bener arua khen atema yangluba mortuary nung rizünga ayur. Police aser naval personnel temi mozüki aser tasü mang agizüker nem security agütsür.

IRIS Dena ya Iran nunger rara nung amshiba rong tasentem rongnung ka aser Moudge-class frigate ka alitsü, koba Iranian navy atema tzüyim taroklen patrols senzür. Iba rong nung prangbong tulu, surface-to-air missiles, anti-ship missiles aser torpedoes keta lir. Iba rong nungya helicopter ka bener senzür.

2023 küm Iran nunger rong ana linük tesem balala sema jajaba nung IRIS Dena ya ka liasü.

US Treasury Department-i rong anaprong ya February 2023 nung sanctions designation agüja liasü.

Dimapur Police-i traffic advisory metetdaksür

Dimapur, Metsüremi/March 04 (TYO): Commissioner of Police, Dimapur, Aotula T. Imchen, IPS ajanga sangdong ka nung, nüburtem kumzükba ayutsü aser security atema March 6, 2026 anepdang 6:00 ako nungi nikongdang 3:00 ako

tashi Airport Junction (3rd Mile) nungi Chümoukedima tashi National Highway nung gari anena ayutsü memelatsü, ta metetdaksüogo.

Iba den külemi 4th Mile (Central Jail Junction) nungi Christian Institute of Health

Sciences and Research (Referral Hospital) tashi lenmang külen dang gari anena ayutsü melatsü.

Nübür ajunga dang amalitep alitsü aser iba totuyuba sülen anidaktsü ayongzük, ta sangdong ajangasa ashi.

NJCF mepelar: Vande Mataram mangatettep tuluba akumer

Dimapur, Metsüremi/March 04 (TYO): Legislators temi tai apuba sülen Nagaland Legislative Assembly-ia mangatettep aliba Vande Mataram ken o ya Select Committee ka nem nungloksüra Nagaland Joint Christian Forum (NJCF)-i Centre indang totuyuba anema Bodhbarnü ola tulu adoka ibai tashiyim amshiba inyakyim ka lir aser ibaji ajanga tamangba yimsü temeden aser 'constitutional principle of secularism' nung aibelener ta ashi.

NJCF-i sangdong ka agütsüba nung, Ministry of Home Affairs ajanga states aser Union territories ajunga dang kaket reju aser institutions densema official sentong ajunga nung linük ken Vande Mataram atentsü totuyuba agütsü atema temulung animesüingzüketer, ta ashi.

Iba ken ya linük meimba den sendaktepa lir, saka ken nung ojang kar Khristan yimsü den mapet, anungji Nagaland ama Khristanpur timba aliba state nung tashiyim agi iba ken tendaktsüba ya magizüketer, ta ashi.

Nagaland nung iba ama

totuyuba sülen anidaka tamangba yimsü tesayuba tashi mait mekumdaktsütsü, aser Constitution indang Preamble nung shia aliba secularism ya züluba aser inyakra nung shidak amshitsüla, ta NJCF-i ashi.

Tang tesüsa Assembly session mapang national anthem jakdak Vande Mataram ken atemba ajanga MLAs kari tai pua House-i iba ken o asadangtsü asoshi Select Committee ka nem nungtsüba sülen state nung iba indang o intepba mapang NJCF-i iba sangdong ya agütsür.

Centre-i Vande Mataram indang protocol tejangja agütsü, aser tangbo iba ken ya sorkari sentong ajak nung atemtsüla.

Linük meimba ya tashiyim amshiba ajanga masadangtetsü, ta NJCF-i ashi.

Nüburtem, talisa tanurtem nem pei tamangba yimsü den mapet ken ka tendaktsüba ya tamangba yimsü temeden anema lir, ta ashi.

"Onoki linük meimba ken anemer masü, saka Khristanpur timba aliba lokti ka asünung, zü

tanurtem nem pei tamangba yimsü anema ola madokdaktsütsü," ta ashi. Iba ken tera yanga aliba den sako masüba yimsü amanger tem dang Vande Mataram tashiyim agi metetdaksütsüla.

"Mulungsentüsü sür alirtemi dang iba amala matsüing dang bendanga agütsütsü aser tang aliba sorkari mapang shia telemsa adokdaktsüba policies tem yangluba mapang NJCF item tebilemba aser policies anema ajang-ajanga nokdaktsü."

Telungjem adokdaktsütsü atema National Anthem kisüing ya teperi, aser nationalism tenüing nung iba jakdang mesüra tesülen kecha marudaktsütsüla, ta forum-i ashi.

Government of India dang tamangba yimsü tsütsü kin tilatem temeden akumtsübotsü ayongzük NJCF-i kin tilatemi linük nung nüburtem tesendaktep nung kasa shilem agiba indang lemsatepa liasü.

Nübür ajunga indang tamangba yimsü temeden amshitsü aser Naga nunger

mulungsentüsü akumtsübotsü asoshi iba totuyuba tanaben asadangshitsü parnoki ajungshia liasü.

Vande Mataram mejemba tanüla nem maksü bener arutsütsü meranger masü, saka ken mejemeri linük meimba atema mulunga magizükba nüburtem dang kangshia iba ken metendaktsütsüla, ta ashi.

Parnoki ketdangsürtem dang tamangba yimsü aser sobaliba nung telemsa tali adokdaktsütsüba policies tem mamshitsü ayongzük liasü.

Parnokisa Assembly mapang legislators kari Khristan yimsü kumzükba ayutsü merangba asoshi pelaba lemsatep aser tarutsü nunga maneni kasaji inyaksü ajungmesoa liasü.

February 20 nü Naga Students' Federation-ia Centre totuyuba anema nokdak aser ibai 'cultural imposition' ka lir ta shia liasü.

Kasa mapang March 4, 2026 nü Dimapur nung sentong ka nung adenba mapang Nagaland Legislative Assembly Speaker, Sharingain Longkumer-ia House

nung mezüingbo sorkari indang protocol ka ama Governor's address mapang tashi anga liasü, ajisüka iba inyakyim yagi kanga sashia o intep, ta ashi.

Mepelatep kar liasü saka sorkari ka ama, totuyuba alinungji, onoki iba sülen anidaktsüsa akum, ta pai ashi.

Iba sülen House-i aginüba ama iba ken o asadangtsü asoshi Select Committee ka tentettsü ajaki mulunga telemtetba agi, ta NLA Speaker-i ashi.

Linük nung Article 371A nung ajemdaker Central Acts aser Laws amshitsü asoshi asadangtsü atema special Select Committee aliba state-ji Nagaland ya dang lir, ta pai ashi.

Iba committee ya kanga tongtipang lir aser House nung lemsatepa angatettepa committee yagi jembitsü aser Union Government nem osang agütsütsü.

Iba committee ya Minister, Parliamentary Affairs aser Minister, Law and Justice tekolak asütsü aser Advocate General züingsem alitsü.

NABARD-i Kangtsung yimtsüung nung TRIBES project amenok



Kohima, Metsüremi/ March 4 (TYO): National Bank for Agriculture and Rural Development (NABARD)-i Mokokchung district kübok Kangtsung yimtsüung nung TRIBES project amenokogo.

Yimdaklirtem libaliro jenjang ajungkettsü aser rongsenketzüng dak sendakba nung maongka tajungba agüja yimdaklirtem nem tashi agütsü nükjidong nung iba project ya amenokogo. Iba project ya tornem

aketba aser mozü süngtonglitongtem ajungkettsü aser integrated fishery, scientific cultivation, value addition aser shishilembaba yimya shitak ajanga alu nungi tali tajungba adokdaksütsü asoshi benokogo.

Meghalaya: GHADC election ozüung aitsü

Shillong, Metsüremi/March 4 (Agencies): Non-tribal tem April 10, 2026 nü taruba Garo Hills Autonomous District Council (GHADC) election nung metokteptsü atema tetuyuba agütsüba ajanga Meghalaya nung olangtep tenzükogo.

ya temzüng ozüung kübok tim asü masü aji ashishiogo aser ashiba agi, non-tribal tem election nung metokteptsü atema GHADC ket nung temzüng ozüung kübok tashi mali.

ashi. Federation of Khasi Jaintia Garo People, Garo Students' Union, aser A'chik State People's Forum (ASPF) densema tribal lokti tentetemi GHADC tetuyuba pusemogo aser iba ya melenshitsu memerangtsü kümdaksüla ta shiogo.

Garö nunger tribal lokti tentetemi aikati GHADC-i February 17 nü iba tetuyuba agütsüba ya agizükogo. Tetuyuba nung candidate ajak yagi Scheduled Tribe (ST) certificate bena alitsüla ta shia lir. Kasa mapang nung non-tribal lenirtemi iba jenjang agiba ya aitsüogo aser ashiba agi iba ya temzüng ozüung nung temeden agüja aliba anema lir.

Balachanda constituency nungi election nung tokteptsü jangrartem rongnungi Enamul Haque-i ashiba agi, iba tetuyuba ya Indian Constitution Sixth Schedule Paragraph 11 dak ajemdaker lir. Pai ashiba agi, iba paragraph yagi regulation ya kodaser benok iba indang dang shia lir aser iba ajanga council nem candidate tem atema eligibility ozüung tasen yanglutsü atema tashi magütsür.

ASPF general secretary Bernita Marak-i ashiba agi, Constitution nung Article 244(2) ajanga autonomous district council tem nem lisopur loktitem yimsüsüba kümsüka ayutsü tashi agüja lir. Laisa, iba tetuyuba sülen manidakra temzüng ozüung aser Constitution agi mekümsüktetsü, ta ashi.

GHADC nung constituency 30 lir aser election ya menden 29 atema agir, aser state Anghi züngsem ka nominate asür. Garo Hills nung lenden lima nung Bengali oshi jembiba Muslim nunger mesüra Bengal nungi jakzükerkem aika lir aser constituency pongu nungbo parnok nütsünyongsük shilem 70 dak tema lir.

Haque-isa, 1952 küm council tentetba mapang nungi iba tesem nung aliba non-tribal tem GHADC election tem nung toktepa aruogo, kechiyong Assam & Meghalaya Autonomous Districts (Constitution of District Councils) Rules of 1951 yagi mekazüka aliba menden kar dak alaka parnok menokdang, ta ashi. Pai, council-i tang tetuyuba agütsüba ya Constitution of India Article 14 anema lir, ta

Garö Hills nung amendaker aliba social activist Cherian Momin-ia Article 244(2) dak ajemdaker, GHADC ya general representative institution ka ama masü saka constitutionally autonomous tribal body ka ama inyaksangshir ta ashi.

Taoba legislator S.G. Esmatur Momin-i iba tetuyuba

Paisa, Sixth Schedule ya tribal tem yimsüsüba, sobaliba temzüng ozüung aser Scheduled Tribe tem sobaliba maitsü wazüka ayutsü atema lir, ta ashi.



Guwahati: Assam Chief Minister Himanta Biswa Sarma-i Bodhbarnü Guwahati nung gari kanga senzüba lenmang nung Bharalumukh kübok Dinesh Goswami Flyover lapoktsüogo. Iba flyover ya kilometer 1.2 lir aser sen crore 99 entoka yangluogo. Iba yagi Machkhowa aser Bharalumukh na sendakteptsütsü.

Arunachal assembly panel-i budget session atema mapanglem renemogo

Itanagar, Metsüremi/March 4 (Agencies): Arunachal Pradesh indang 8buba Legislative Assembly Business Advisory Committee (BAC)-i, March 6 nü nungi tenzüka agitsü aliba state indang budget session trokbuba atema mapanglemtem tembanga renemogo.

Z ü n g s e m t e m i Comprehensive Study Book of Rules of Procedure aser Conduct of Business update tem sensak asem, koba assembly indang committee balala atema guideline dak rangloker sensaksama liasü.

Iba panel yagi iba session kecha tetsükdaksü makai agitsü atema legislative proposals aser sorkar inyakyimtem kanga junga asadangogo.

Legislative mapa tali tejangjaba kümdaksütsü aser tedangshiba inyaksü atema benoka aliba amendment tem agizüka liasü aser committee report ya agizüka ayutsü asoshi budget session mapang formally benoktsü.

Speaker Tesam Pongte Tutsa lenisüba nung iba senden amen, kong Parliamentary Affairs Minister Pasang Dorjee Sona, Deputy Speaker Kardo Nyigyor, aser züngsem Kumar Waii, Thangwang Wangham, Nikh Kamin, aser Oken Tayeng nungeri shilem agia liasü.

MLANinong Ering, Wanglin Lowangdong, aser Thangwang Wangham nungera iba senden nung dena liasü. Parnok den Advocate General Indraneel Choudhury, Secretary Tadar Meena, Additional Secretary Agaab Mossang, Deputy Secretary Longman Ronrang, aser Undersecretary Kheto Lowang nungeria senden nung shilem agiogo.

BAC session magi tsüngda assembly indang Rules Committee, Speaker Tutsa lenisüba nung tanabuba senden mena liasü.

Mizoram: Mezügbuba FCI jang Sairang Railway Station tongogo



Aizawl, Metsüremi/March 4 (Agencies): Mizoram indang food security jenjang tajungba küma Food Corporation of India (FCI) indang jang Mongolbarnü Sairang Railway Station tongogo, ta ketdangsürtemi metetdaksü.

arrtsü anasa Kolasib district kübok Bairabi tesem dang tonga liasü.

Railway wagon 42 nung jang quintals 25,900 shi Punjab nungi bener aruogo, koba Sairang nung tawa yangluba FCI godown nung rizünga ayutsü. Iba godown ya state nung ibala mesükba facility tulutiba lir.

Sentong nung o jembiba mapang Lalchhanzova-i iba alizüung tongtetba atema state nem tenüngsang agütsü.

Iba jang ya Rajya Sabha züngsem aser FCI Mizoram Consultative Chairman K. Vanlalvena den Food, Civil Supplies & Consumer Affairs Minister B. Lalchhanzova-i agizüka liasü.

"Rail ajanga Sairang-i jang bener aruba ajanga, tzüngluruwa tonga aruba mapang kanga dang nüngdaka aliba jang rezünga yua atatetsü," ta pai ashi.

Vanlalvena-i ashiba agi, Sairang-i rail ajanga indang indanga jang bener aruba ajanga jang lemtsütsü asoshi menomeyangba tebilemstü bentetsütsü. Taoba mapang lenmang ajanga talang nungi jang bener aruba agi district godown balalai jang menoa-ang lemshia liasü, ta paisa shisem.

Minister-isa, Mizoram nung itashia jang quintal 97,000 nüngdaker aser jang ya quintal 55,000 bo FCI nungi agizüker aser quintals 41,000 angati agütsür. Tanungba jang ya Open Market Sale Scheme (OMSS) (Domestic) ajanga quintal nung sen 839 agi alizüker, ta ashi.

"Rail tesendaktep tasenba ajanga inyakyim ajak takaratiba kümdaksütsü imlar," ta MP-i ashi.

Paisa, jenjang tajung jang alitsü atema tang inyaktepdar, ta ashi. Bairabi-Sairang lenmang lapokba sülen Sairang Railway Station ya Aizawl nung FCI godown tem aser Lunglei o Lawngtlai district tem atema jang rezünga ayutsü asoshi iba ya tongtibangtiba tesem akümtsü, ta Lalchhanzova-i ashi.

Taoba mapang jang bener freight train tem ya Assam den

Bairabi Railway Station yagi north len aliba district tem atema supply tem achaayangtsü, ta paisa shisem.



March 04, 2026 nü New Delhi nung Finland Tir, Alexander Stubb-i Palam Air Force Station semdangba mapang tangokba noksa nung angur.

India nung hopta 6-8 peritsüsa totzü rizünga lir: MoPNG

New Delhi, Metsüremi/ March 04 (Agencies): Tang West Asia nung rara adoka aliba mapang nung India nung er aikati petrol, diesel aser liquefied petroleum gas (LPG) agi anüngtsüa akok, ta shisabuluba mapang nung Bodhbarnü Ministry of Petroleum & Natural Gas (MoPNG) nung tongti ketdangser kati, India nung hopta 6 nungi hopta 8 tashi totzü agi peritsüsa crude oil aser totzü rizünga lir, ta metetdaksü.

Taoba hopta tatembanglen US aser Israel nati Iran amakba sülen Iran-ia kidanger linüktem nung America sepaitem amenoka aliba tesemtem amaker.

Iran-i Strait of Hormuz shibangba ajanga joko khu abenba rong kata mesenzüteter. India nung totzü aser gas

supplies atema iba tesem ya tongti lenmang ka lir.

India nung liquefied natural gas (LNG) bo tera dang rizünga lir, kechiyong crude oil mesüra totzü ama masü saka LNG aika rizünga ayutsübo kanga tasak. Iba dak alia Strait of Hormuz shibangba ajanga India atema LNG supplier tulutiba Qatar-i LNG production anenogo.

MoPNG ketdangser kati, sorkari West Asia tensa ya junga mita repringdar aser Qatar-i LNG production anenyonga India nung hopta ka nungi anogo 10 tashi peritsüsa LNG lir, ta ashi.

Iba denji külemi Indian oil & gas firms-i tanga markets nungia LNG abentsü atema lenmang bushidar, ta paisa metetdaksü.

Tesüiba ita ishika anogo shia

India-i crude oil barrel million 2.5-2.7 shi bener arur aser ibaji tesadang shibo Strait of Hormuz ajanga Iraq, Saudi Arabia, United Arab Emirates aser Kuwait linüktem nungi abener.

Tang Indian refiners ket nung anogo 25 shi peritsüsa crude oil rizünga lir.

MoPNG-ia sangdong ka ajanga, "West Asia nung rara ajanga timtem adokba mapang nung mapang tatsüka atemabo peritsüsa linük nung crude aser petroleum products peria dang lir," ta metetdaksü.

"Supply mita repringtsü atema Ministry-i 24x7 Control Room amenokogo. India nung nungdak apir nungdak dang süra timtem pungsatsü atema sorkari tanga lenmang bushia inyaksü," ta Ministry-i metetdaksü.

PM Modi-i Qatar, Oman aser Kuwait lenirtem den jembiba

New Delhi, Metsüremi/ March 04 (Agencies): Ato kilonser, Narendra Modi leniba nung sorkari West Asia nung aliba India nungertem kümzüka alitsü atema inyaka aruba den külemi Bodhbarnüa pai Qatar, Oman aser Kuwait nung lenirtem den jembigo.

Modi-isa Iran-i Qatar, Oman aser Kuwait linüktem amakba atema aitsü.

Tamalen Modi-i Saudi Arabia, Bahrain aser UAE lenirtem den-a jembiba liasü.

Item linüktem nung lenirtem den jembidang Modi-i Iran aitsüba den külemi India nung kümzüka alitsü atema ketdangsertemi inyakba atema pelaba lemsatop.

Bodhbarnü Oman Sultan Haitham bin Tarik den jembidang Modi-i West Asia tensa atema pa tebilemba lemsatopa liasü.

Sultan Haitham bin Tarik aser Modi napronglai region nung yimjung atema telok ajaki tekeraba nung ken o jembitsüla

ta bangjem.

Modi-i, "Oman-i maneni India nungertem nungita yariba atema pelar," ta metetdaksü.

India atema Oman ya defence tsütsü tongti partner ka lir. Qatar Amir Sheikh Tamim bin Hamad Al Thani den jembiba sülen Modi-i X ajanga, "Ken o jembiba ajanga tekeraba nung region nung yimjung alitsü nungdak ta künati jembigo. Tang ama tensa mapang ka nung Qatar nung India nungertem maneni nungita yariba aser anepaluba atema pa dang pelaba lemsatopogo," ta metetdaksü.

Modi-isa X ajanga, Kuwait Crown Prince Sheikh Sabah Al-Khaled Al-Hamad Al-Mubarak Al-Sabah den jembigo, ta metetdaksü.

Kuwait nung India nungertem kümzüka alitsü atema Kuwait nung ketdangsertemi maneni nungita yariba atema pelaba lemsatopogo, ta paisa metetdaksü.



March 04, 2026 nü Agra nung bendanger raliwalirtemi Taj Mahal anasa Holi benjung amongdang tangokba noksa nung angur.

India nung rong 38 Persian Gulf nung lir

New Delhi/Mumbai, March 04 (Agencies): Tang India nung rong 38 Persian Gulf nung lir; item rong teimbaka nung crude oil aser LNG bener lir.

India nung rong 38 nungji nisung 1,100 shi lir aser tang West Asia nung rara ajanga rongji Mongolbar nungi Persian Gulf nung anendena lir.

Mumbai nung Shipping ketdangsertemi, Oman tzüyümken amakba ajanga rong nung senzür India nung asembo süadokogo aser ka yirua lir, ta metetdaksü.

Rong nung aliba India nungertem kümzüksüji sorkar

atema tongtibangtiba mapa lir, ta ketdangsertemi metetdaksü.

Mongolbarnü Shipping Minister Sarbananda Sonowal-i senden ka ayongzüka amenba mapang nung pai DG Shipping densema ketdangsertem dang tzüyüm nung senzür India nung kümzüksü atema inyakang, ta tuyuogo.

Iba senden nungji DG Shipping-i West Asia tensa osang metetdaksüba den külemi India nung rong aser tzüyüm nung senzür India nungertem osang metetdaksü.

Paisa, Strait of Hormuz anüolen tsütsü India nung rong 14 lir aser Strait of Hormuz

anüdoklen tsütsü India nung rong 14 lir, ta metetdaksü.

Paisa, bendangertem rong nung aliba India nung asembo süogo aser ka yiruogo, ta metetdaksü.

West Asia nung rara tenzüka sülen tankers pezü raksago aser Strait of Hormuz nung rong 150 shi anendaka lir.

Container Shipping Lines Association (India) Executive Director, Sunil Vaswani-i, "Lendong majurutsü atema West Asia leni aoba rong aika thinenogo saka US, Europe aser Mediterranean tsütsülen khu abenba rongtembo maneni senzütsü, ta metetdaksü.

Iran tongti lenir Khamenei tepsetba Omar Abdullah-i aitsür

Srinagar, March 04 (Agencies): Jammu & Kashmir chief minister Omar Abdullah-i Iran tongti lenir Ayatollah Ali Khamenei tepsetba aitsüba den külemi nüburttem dang tejashi azüokang aser ozüng alema kecha teinyak, ta mepishi.

Mongolbarnü Jammu & Kashmir Lieutenant Governor Manoj Sinha-i security senden ka ayongzüka amendang ketdangsertem dang kanga yakyaka alitsü aser tensa raksaba nokdangtsü atema inyakang, ta tuyua liasü.

"Lieutenant governor-ia sensotem aser lenirtem dang tesünep meraksatsü ayongzüko," ta ketdangsertem osang ka ajanga metetdaksü.

Mongolbarnep Army Northern Command tongti, Lt Gen Pratik Sharma leniba nung Srinagar nung senden ka mena Kashmir Valley nung security tensa asadangogo.

Khamenei tepsetba anema Hombar nungi Jammu & Kashmir tesem balala nung

nüburttemi longkak aiter, aser ibaji ajanga tensa raksatsü tsübua sorkari March 7 tashi schools aser college ajak shibangtsü tuyua lir.

Osangbenertem den jembidang Omar-i, "Ni Iran nungertem den tejashi lemsateper aser Iran amakba aitsür. Iba denji külemi ni Jammu & Kashmir nung ozü nüburttem danga tensa meraksatsü mepishir. Nisung kari tensa raksatsütsü meranger. Tesem kar nungi item osangji angashir. Police mesüra central paramilitary sepaitemi tashiyim amshitsüsa akümba tensa ka ni maginer. Ibajibo tesasatsüka asütsü," ta metetdaksü.

Omar-i, "Lenir shimtsü atema Iran nungertem dak dang temeden lir. Bendanglen nungi tashiyim amshia sorkar akümtsüji International ozüngi memelar. Taochi makai Iran tongti lenir aser par kibong züngsemtem tepsetogo. Yamaji inyaksüsa koba ozüng ajanga America mesüra Israel nem temelaba agütsür?" ta metetdaksü.



March 04, 2026 nü Ahmedabad nung aliba Sadar Patel International Airport nung Saudi Arabia nungi aruba tayimtsü ajanga aruba India nungertem agizükdang tangokba noksa nung angur.

- ALI AYOKER -

* Prime land for Urgent Sale ! * Naga united village
 * 70,000 sq. ft. * Plain stable high land
 With concrete boundary walls and natural drainage.
 * Near the main road * Any plot size available
 @ 430/- sq. ft (Negotiable & No broker)
 Contact : 7628822085 / 9366156425



TIR YIMYIM YIMOBILEM (EDITRIAL)

DIMAPUR THURSDAY, FEBRUARY (METSUREMI) 05, 2026

KAKET ANOGOMONG

- Tangsen Lemtur

Otsü ashiba, otsü angaba mesüra kakat azüngba ya amajok nung mapang intokba ka masü. Tebushitetba balala ajanga ashiba agi, nai otsü ashiba ajanga nü tekolok shisatsü kanga arener, kechiyong asenok shi-mang atema exercise nungdakba ama tokolok-a tashi itta aser anema alitsü atema exercise nungdaker, iba denji külemi nai otsü ka angadang mesüra azüngdang tatalokbatemji nai imdangi arua bilemba ajanga nü koloki mapa jenti inyaker. Alima nung otsü mesüra kakat melira koma ka süla? Atangji otsü aser kakat melira asen taküm nung langka mabensa amai asütsü. United Kingdom aser Ireland nungbo küm shia March ita mezüngbuba Yangtepnü (Brihostibarnü) 'World Book Day' amonger aser kakat azüngtsü ajungshitsü atema tanurtem nem 'book vouchers' agütsür. Ajioda taküm-a parnoki tanü (March 5) 'World Book Day' amonger. United Kingdom nung 1998 küm mezüng iba anogomong monga liasü. Anü külen küm shia April 23 anogo nunga alima tesem ajaklen 'World Book & Copyright Day' amonger. Alima nung kakat keno zülur nungtugu nisungtem nem tetushi agütsütsü atema 1995 küm France yimtiba, Paris nung adenshia UNESCO senden amendang 'Alima Kakat Anogo' amungtsü lemteta liasü. Iba ama World Book Day atema anogo ka meja-meja shimteter amungdang asenokia kakat azüngba nung tepela aser shisatsü angutsü atema bushitetsüla, iba denji külemi ajak ajangzüksü atema kakat ken o zülurtem bilemteta tetushi agütsütsüla. Shisatsü, loktiliba aser sobaliba ajak nung liromedema terenlok akabaji kakat balala, ocet aser osangkakettem azüngba ajanga lir. Mashimalu aser sensak tia koktettsü atema lenmang kaji shisaliok lir. Tanü putu nungbo anogo shia Internet ajanga mapa balala inyaker. Nisung kati minute pongu tsüngda computer nung rangloker mapa inyakba den külemi email repranger, Facebook aser WhatsApp ajanga medemer aika den semsaksemer, smartphone repranger aser külem mapa inyaker den o jembir. Yamaji khen nung mapa aika nung ranglokba ajanga mapa ka danga nendaka meinyaketba den külemi tekolok-a kanga anibeledaktsür. Ajisüaka nai kodang kakat ka bena arua züngdir, nai nü mulungjang ajak agi otsü nungji dang rangloktsü, koba ajanga nai tajangzük aika angur. Kakat ka jenjang kanga tasak, ajisüaka kakat meimertemibo sen intok mesasai kakat jenti alidena nija kakatnang-a (personal library) ayur. Ajisüaka tangbo sen meintoki internet ajanga e-reader, ebooks nungi angati kakat balala download süa züngtettsüsa tanübo mapangi sempetogo. Tanü technology kanga kara ainba putu nung PDF mesüra ePub ta ajaba format tem nung kakat aika angur aser itemji aseni e-reader, iPad mesüra computer screen nung azüngtsü akok. Kakat azüngba ajanga tekolok anema lidaktsür, anibelem ajema kümdaktsür, tayongzükba balala koktettsüsa shisatsü angur, temulung nung aika rizünga yutettsüsa tekolok rendaktsür, lenla ajaklen nungi shisadangtsüsa shisatsü angur, temulungjang züngzünga kümdaktsür aser tesünep angur, item tajangzüktem dak alia tajung aikabo malitsü südi. America nung nungtugu, John Waters-i ashiba agi, "Na südoksünemtsü atema dangbo kakat mazüngtsüla. Na tali tesangraba akümstsü atema azüngtsüla." Kakat meimer kati akumli nung aika ajangshir, kakat meimer rongnung asenoka densema ali asü (?)

OLEMSABANG

SARASADEM

- N.T. Jamir, Mokokchung

Asen Aoer sarasadem langzür südi? Hao langzüogo. Koma langzü? 1976 nung Tanela temeshi meküploksüdang kongshia tanela nung tanaben asortem; idangji alirtem kar tila tanur, kar ayir asangur, kar kibong lanu aser kar tain rogotem, parnoki anir aika tanaben sor kotaki ogo. Tang anünga alirtem aika taochi agüja tanaben soshiogo.

Tan Jan 31st 2026, nü sarasadem danga nisungtem sentepa alirtem dang masü saka media nung repranger dena aika kotaki aotsüpurtem lir. 76 revival metsü lanur aika Theologian dang masü saka secular telen nung alir aika tanela nisung adokogo. Temeshi lai tesayauba ama tanela nung tanaben asorbo ajak kotaki aotsü, kechiyong asen Tsüngrem ya temeim taochi sayuba nung kodanga aniseta malir aser kodanga malaker. Nisungbo ken anaben inyaker, jembirbo aniseta akümer aser lakadoker, Yisuiibo yamaji masür.

Asen Aoer ya Isreal nung noksa, Isreal nungeri kodang Tsüngrem sendok, alima kin ajaki tansütsü otsü süa jembitsüba lai nung ashibatemji, par tetsü teboui par Tsüngrem sendokba yong yamai atalok ta jembitsüba lai nung zülua lir. Yamaji asen Aoer-a Naga kin ajaki aser alima tatem nung aliri jembitsüdaki. Asen Aoer karibo o tapu aika jembia sarasadem senshidang par 5 asüba ya Aoer menen tongzük ta jembir, yamaji mejembili, saka Tsüngrem o-i ashi, Isaia 57; 13 – Temeshipur samar aser shingaia temulung nung mayur. Aser Tsüngrem tsübuba nisung bener oadoker, aser shingaia tarutsü tamajung nungi temeshipur bener aoer ta meshisadanger. Parnok temeshidaki ayir, parnok lep nung anisüngzüker. Saka asenokbo lokti menen nangzüksü adenshia sarasademji Tsüngremi dokogo ta amangdi, asenok nijaa Tsüngrem o mebenshiba taitem bushidi.

Asen Aoer ji Isreal nung noksa ta shitetbaji Nagaland nungbo Yisu osangji asen kin dangi tama aru. Isreal nung dangi Yisu osang jelia abentsü yoksang Yohan baptitsüba-i ashi, 'tekirak lenmang longkong metonga yangluang'. Aji oda temulung meyipa baptitsü aser sayutsüngia Yohan-i ashi, 'Per chirtem tarutsü terasaba nungi ajentsü nenok dang shibai ashi?'. Anungji temulung meyipa den temsüa tejang tangang, aser Abraham ozü tebu lir ta nenok temulung nung teblem'. Iba tetezü Abraham semchirtem ta asübaji Parnoki konang küma bilem. Kechiyong parnoki Mosa ozüng telatet nung kanga takang; awashi metetba, kati-ka dang junga benshiba, merük-mejuba aser tazüokba nung liasü. Saka parnoki tangar kin kanga sempa aser mezümeshi ajanga tangar yiruja tesangra o jembir. Anungji Yohani per chirtem ta aja. (Luk 3:7). Asen Aoer-a parnok mesüka lir, kechiyong asenoki ashir, onok samanir, onok-onok. Aji oda Yohani sayutsüngia olong kar ashibaji, 'Nenok temulung meyipang aser tzü nung baptiang, kü dang temaba kar arudar. Pai nenok mi aser tanela nung baptitsütsü. Pa ket nung per am-a lir aser Pai tsüksü ajak sepdoktsü'. Iba tetezü Pai o bendangtsü; Pai longkong metong metonga yanglutsü, tekirak lenmang süsüa akümstsü. Iba tetezü ochi mashi, teraksa tamajung kenyongi mebenshitsü ashiba lir. Saka idangji aikati ratamata arua Pa dang asüngdang, alimelen sarurtem aser kar sepaytem liasü. Parnokbo angateta ashi nungji nüji tanela agizüka temulung meyipa bapti nung yamaji lir kotaki or alitsü. Saka Isreal nungertemi iba oji tezülen yutsür yimsü-yimpong tajungtem dang benshia sayua aru nung ochimashiji Yirusalem tenla kima nungi tenzük. Anungji Yisu kodang Pa Tebui tenyaba mapa inyaktsü tenzük, Yirusalem tenla ki meshiteterang tenzük. Aji oda tanü tashi Isreal Tsüngrem dak amanger ajak iba menen tongpang raradagi. Tsüngrem oi ashir, temenen den timtem ajak sendaktepa lir, ajia oda sen meimbaji temenen asünung kodang Nagaland state angu, küm piyong sen ta asübaji takar dak alaka teka dangi marudangi aliba; school tera züngsar alibo ita sen angu tenzükji alima civilization ya ati bilema shi-angu den dang cchiyonga office nung ochimashi mapatemji tai ta mebilem, ter shilem agütsünü dang agütsüli, magütsünü dang magütsüli; timbai küm piyonga magütsüli süidaktsü. Ano tanüngertema class 10 pass süra mapasa agütsü, kar zünger mapa anguji melamela Hap menden ngur Jeep gari anguji driver nem gari anidaktsür aier tepur tajung anir Jorhat, Dimapur len anir senzütep, saka arogo nung ter shilembo magütsü. Gari agütsübaji pa konang nungsang atema dang agütsü. Külen pei chirbo anak awa aküm, karbo anojungi tanur meintetdang arishi tembang. Ano aji dang masü state angudang Kohima yimdong nung yi talubosa jemtep ta ashir. Saka iba dangji Tsüngremibo rakzükraatemtem ta ashir. Isaiah 33 nung, 'na rakzüraktem anener külen ni rakzükraatemtsü' ta ashiba ama asen dak ataloker. Iba menen nangzüka sarasademogo, anungji Tsüngremi tadok agütsüogo ta amangdi. Aji lokti temenen ano kija temenena Tsüngrem o angashir mebenshiba tai nangzüksüla. 2 Putipuyang 7:14 nung sarasademra ner lima aneptsü ta shia lir. Saka ya Tsüngremi sayaji asen limajia noklang nung noklangbo maneptsü akok, saka Tsüngrembo Pa kechi teinyaktsü ajibo inyaktsü, anungji na aser ni tanela nung anepa aji teperi. Saka reprangang! Taküm ya Tsüngrem terasaba makok meküploksüba küm asünung asen Aoer dang masü North East ajak nung temeshipura dena nisung aika asütsü Tsüngremi shiogo.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

August ita nung COICOM Communicators conference agitsü



Yaküm September ita nung San Pedro Sula, Honduras nung COICOM 2025 Congress sentong nung tangokba noksa nung angur.

March 04, 2026: Khristan media organization, Confederación Iberoamericana de Comunicadores y Medios Cristianos (COICOM)-i Houston (US) aser Guatemala City (Central America) na nung training aser ministry networking sentongtem agitsü sangdongba sülen evangelical communicators aser lenirtem iba atemaji renemdar.

America tesem ajaklen Arogo longjemdaktsütsü nükjijong nung item sentong ya taküm küm tom sülen agitsü, ta COICOM-i metetdaktsü.

Mezüngbuba sentongji United States nung August 10-

12, 2026 anogotem nung agitsü. CMC Houston den senteper ayongzükba sentongji Spanish oshi nung agitsü, aser iba ya media organizations tsüngda tesendaktep tashi itshitsü atema lir.

Iba sülen November 2-4, 2026 anogotem nung Guatemala nung Continental Conference agitsü. La Cumbre Convention Center nung ayongzükba agiba sentong nungji pastor tem, business lenirtem aser communicators adentsü.

Conference nungji artificial intelligence, digital marketing aser radio & podcasting atema-

a temeja sentong agitsü. Iba dak alia Fexpocom Fair ayongzüktsü; iba fair ya Khrista osangtajung lemsateptsü atema Khristan organization s longjemdaktsütsü atema lir.

COICOM-i züngsemtem aser media mongintem dang iba sentong nung shilem agia adenba ajanga temoatsü angutsü ayongzükogo.

Tawa COICOM-i Board of Directors nung Mynor Vargas Chairman shimogo. Pa lenisüba nung tanü putu nung lokti nung temelenshi adokdaktsütsü atema Khristan communicators yaritsü bangjemogo.

ANOGO ABEN TSÜNGREM DEN

Ochiji angazükang

Kodang tanela temeshi arudir, pai nenok ochiba dangi anitsü. Yohan 16: 13.

Khristan mapa meinyaknü dang asenoki kuli balala bener arur, "Ni kanga tambur" mesura "Ni aika meteta mali" mesura "ni kü shilem inyakdagi". Khristan mapaji temela akümstsü ataa lira mesüra azünga aliri inyaktsü atara, aseni inyaktsüba mapaji kodanga meinyaktetsü.

Asenok tebenja lima nung alir aser itemji ajanga Khristai anitsü ta amangbaji kanga agi tajungba. Kibubai yaritsü ta asenoki amangtsü akok. Pai asenok temenen nungi alangzüktsü aser temenen tatokba jangjadaktsütsü Khristai meyokama? Asenoki mamangdang tama mesüra arogo nung matendang tama, mesüra telok nung metenzükdang tama kechisarena ajak angatetsü merangra, asenoki kodanga yamaji meinyaktetsü. Tanela Temeshi-i ochiba dangi anitsü ta Khristai ashiba nung asenoki amanger. Asenoki angatetba nung tashi angaa inyaktsü Tanela Temeshi ajanga Tsüngrem o nungi tejangja agütsür. Nai nüngdakba ochiji ajak dangi Tsüngrem o, Laishiba ajanga Tanela Temeshi-i anir ta amangang.

CBN Ministry-i Iran nung küm 20 tashi osangtajung lemsatepa arudar



Edwin Abnous

March 04, 2026: CBN-i satellite TV broadcasts, webcasts aser phone centers ajanga küm 20 tashi Iran nung Khrista osangtajung lemsatepa arudar; parnoki iba ministry dang Heart4Iran. ta ajar.

700 Club broadcast nung shilem agia jembidang Heart4Iran executive secretary, Edwin Abnous-i iba ministry indang metetdaktsüba den külemi Iran nung nüburtem taginüba metetdaktsü.

Yaküm December ita tatembanglen nungi tenzükba taküm January ita tashi Iran nung nüburtemi yimsüsürtem anema longkak aitba mapang sepaitemi longkak aiterem dak tashiyim amshia nisung jenti tepsetogo.

Iran nung tesüiba küm jenti Khristantemi reshikangshi ajangshia arur.

Edwin ya Iran nung aso, ajisüaka pai Laishiba alemba densema missionary mapatem inyakba ajanga pai reshikangshi ajangshi aser 1999 küm nung pai Iran toktsür ao.

Pa ya North Carolina nung aliba Southeastern Baptist Theological Seminary nung graduate asü, aser tang pa iba Seminary nung professor inyaker.

2008 küm nungi pa Heart4Iran nung producer inyaker aser Mohabat nunga inyaker. Mohabat ya Heart4Iran ministry indang tongti satellite channel lir.

"Küm 20 tejaklen CBN-i 'Tsüngremi Iran atema otsü tasen ka züludar' ta meteta liasü. Ibayongji onoki yangji tenzükba wadang inyaknüa liasü; ajioda Heart4Iran ya tenzükba liasü," ta pai metetdaktsü.

Iran nung nüburtem Islamic talenba nungi salatsütsü nükjijong nung taoba hopta US aser Israel nati senteper Iran amakba mapang ka nung CBN ministry küm 20 jungogo.

CBN ministry kübok Farsi oshi nung 24/7 satellite broadcast densema lir. Iba ministry ajanga anogo shia Iran nung den Khrista osangtajung lemsateper.

Turkey ya Special Watch List (SPL) nung züngoktsüla: Vicky Hartzle



Vicky Hartzle

March 04, 2026: Turkey linük nung ketdangsertemi linük security nung ajemdaker bendanger Khristantem meindokba atema European Parliament nung teblemstsü kaa jembitepba sülen US Commission on International Religious Freedom (USCIRF)-ia Turkey ya Special Watch List (SPL) nung züngoktsüla, ta US administration nem takhangba agütsüogo.

2020 küm nungi tenzükba tang tashi nung Turkey nungi bendanger missionary 200 dak tali meindokogo aser ibaji ajanga Protestant Arogo aikati nung lenir mesüra ordained ministers makai kümogo.

Taoba ita nunga European Court of Human Rights (ECHR)-i Khristan 20 shi Turkey telungi maitdaktsüba metetdakja Turkey dang telangzüba meshiogo.

Turkey nung yimsü temeden anema inyakba atema iba linük ya Special Watch List nung züngoktsüla, ta USCIRF-i metetdaktsü.

USCIRF Chair, Vicky Hartzle-i, "Bendanger Protestant Khristantem ya linük security atema amokmeren, ta Turkey-i jembibaji Khristantem amokmerentsü aser tekülem magidaktsütsü atema lir. International ozüing kübok yimsü temeden ya ajak atema lir," ta ashi.

Laisa, "Yaküm September ita nung Tir Trump-i Tir Erdo?an dang ashibaji maneni US administration-i inyaktsüla aser Turkey nung yimsü temeden tajungba akümstsü atema inyaktsüla. Khristantem anema asalentong tamajung benokbaji nokdangtsüla," ta ashi.

Turkey telungi maitdaktsüba Khristantem atema ADF International-i European Court of Human Rights (ECHR) nung ken o benoka jembir.

ADF International nung Advocacy Director, Kelsey Zorzi-i, "US sorkar aser alima linüktemi yimsü temeden atema maneni nokdaktsüla aser Turkey dang Khristan missionary tem meindokba anenang ta ashitsüla," ta metetdaktsü.

"Khristan yimsü benshibaji security atema amokmeren, ta shia linük nungi Khristantem meindokba ya tim masü," ta paisa metetdaktsü.

AO OSHI ANGAZÜKDAK:

TANÜ ANGAZÜKTSÜBA OJANG



Ulura

(adj) tali tulu, kanga tulu (too big)

* Ki ulura nung aliba agi mapa aika adoker.

Ulusem

(v) ulua aliba nung bendenlok, tuluba kümdaktsü (added to increase)

* Kidang kinunger aika sentepa aliba agi kibong ulusem.

OLONG PAITEP # 7433

Grid for OLONG PAITEP # 7433 with numbers 1-17 placed in specific cells.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembanga - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba /Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7432 TELANGZÜBA

TIPIEN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER



T20 World Cup 2026 yagi viewership dak sendakba nung record ajak ajateta, iba asayamung ya tang tashi nung nisung timtibai repringba World Cup kümogo. India nung viewership million 500 ajangba ICC mendenbuba Jay Shah-i metetdaksüogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Raijor Dal-i Assam election atema candidate 11 sangdongogo

Guwahati, Metsüremi/ March 4 (Agencies): Sivasagar MLA Akhil Gogoi-i aniba Raijor Dal party-i taruba Assam Assembly elections atema nominee tem indang mezüngbuba list sangdongogo.

Party-i mezüngbuba shilem nung candidate 11 tenüng sangdongogo, aser tanungba candidate tem takaratiba nung sangdongtsü imlar.

Tongtimbang nisungtem rongnung taoba mapang Goalpara College nung assistant professor Gyanashree Bora densema lir, shiba Raijor Dal nung adenba sülen 101-Mariani constituency nungi tokteptsü.

Taoba All Assam Minorities Students' Union (AAMSU) tir Azizur Rahman-a 68-Dalgaon menden nungi tokteptsü. Taoba Congress lenir Abdur Rashid

Mandal, shiba tang Raijor Dal nung denogo, pa 14-Goalpara East constituency nungi tokteptsü.

Osangbenertem den sensaksema mapang party-i ashiba agi, party working president Romen Chandra Borthakur 51-Jalukbari constituency nungi aitsü, kong pa Assam Chief Minister Himanta Biswa Sarma den tokteptsü.

Ano candidate tem rongnung 41-Manas nungi Anjan Talukdar, 83-Dhing nungi Mehboob Muktar, 73-Tezpur nungi Alok Nath, 73-Sissiborgaon nungi Dulal Chandra Barua, 84-Margherita nungi Rahul Chetry, 84-Digboi nungi Lakhyajyoti Gogoi aser 105-Bokakhat nungi Ratan Daw nung densema lir. Congress-i parnok mulungka

nung candidate tem tenüng sandongba atema Akhil Gogoi-i aitsüba sülen tang par party-i candidate tem tenüng sangdongogo. Gogoi-i ashiba agi, Congress-i candidate sangdongba ya inyakyim alema lir, kechiyong parnoki Assam nung alliance partner akümtsü aliba party tem den menden lemdangsü atema tembanga mejembi lir.

Congress-i ashiba agi, election nung Raijor Dal den longjemer tokteptsü atema ken o tembanga mejembi lir aser ken o dak sendakba nung maneni sensaksemdar.

Raijor Dal-isa, parnok Assam Jatiya Parishad (AJP) den longjemer inyaksüta jangjatsüogo aser alliance tuluba küma yanglutsü atema maneni inyaksü, ta shisem.

BTC Executive Council züngsem 17 kümogo

Guwahati, Metsüremi/March 4 (Agencies): Bodoland Territorial Council (BTC) Executive Council nung züngsem 14 aliba 17 kümtsüogo. Assam Angh-i agizükba sülen Council züngsem talila züngoksemogo.

BTC tekolakba Hagrama Mohilary-i mepeshiba sülen iba telemtetba agiogo, ta Angh indang Secretariat nungi March 3 nü sangdong ka ajanga metetdaksü.

Members of Councils (MCLAs) tem rongnung Goreswar ST constituency nungi Maheswar Basumatary,

Nagrijuuli non-ST constituency nungi Lakhi Das aser sorkari nominate asüba züngsem Karmeshwar Roy nung Executive züngsem kümogo, aser iba ajanga council züngsem ajak senteper 17 jungogo.

Executive züngsem tasen asem ya Kokrajhar nung March 6 mesüra 7 nü tenangzüktepba agitsü Angh-i temelaba agütsüogo.

Züngsemtem tenangzüktepba agitsü atema Assam sorkar kübok Additional Chief Secretary aser BTC Principal Secretary in charge Mukesh Ch. Sahu, IAS nem nongloktsüogo.

Jenang tapet agitsü atema Additional Secretary Bidit Das-iba osang ya Chief Secretary, Director General of Police, Chief Minister Office aser Bodoland Welfare Department nung nem agütsüogo.

Executive Council züngsem tali bendenlokba ya Hagrama Mohilary-i aniba BTC sorkari yimsüsüba dak sendakba nung jenjang tongtimbang ka agiba ama repringteter, kechiyong iba ajanga Bodoland Territorial Region nung inyakyimtem balala benoka minyak tsüngda executive structure tashi itshidaktsür.

Imphal airport nung opium seret ana apu



Imphal, Metsüremi/March 4 (Agencies): Manipur nung security force temi Imphal airport nung opium seret ana puogo aser state kübok tesem balala meita aoba mapang telungpur ka apu aser prangbong injanga nguteta liasü, ta ketdangsürtemi Bodhbarnü metetdaksü.

Temesepba mozü ya airport nung Mongolbarnü teti ama bushisüngdangba mapang Central Industrial Security Force (CISF) personnel temi nguteta liasü. Opium ya sota yuogo aser iba ya kong nungi bener aru aser shirnoki shibelentsü meranger aji jangjatsü atema bushisüngdang tenzüokogo.

Tanga meita aoba sentong ka nung security force temi People's Revolutionary Party of Kangleipak-Progressive den

sendaktepa aliba rakzükkradem ka puogo. Aija alisang ya Achom Luwangba Meitei (44) ta jangjaogo, shiba Thangmeiband Polem Leikai nungi saka tang Imphal West district kübok Langol Yumjaomanbi Leikai nung alir ka lir.

Pa ya Langol nung Wangdei Meitei Leikai nungi pua liasü. Pa ket nungi mobile phone pezü aser Aadhaar card ka ngutetogo.

Maneni tanga meita aoba sentong ka nung Manipur Police-i Imphal West district kübok Moirangkhom Loklaobung nung alir Waikhom Ratan Singh (46) par kidang nungi puogo. Meita aoba mapang 9mm pistol ka nguteta liasü.

Kasa mapang nung central security force tem aser Manipur Police senteper Hombarnü

Churachandpur Police Station kübok Old Gothol yimtsüng meita aoba mapang prangbong injang aika ngutetogo.

Parnoki apuba prangbong injangtem rongnung country-made single-barrel rifle ka, bolt-action rifle ka, country-made grenade ka, telescopic sight keter aliba .22 rifle ka, pump-action ammunition, single-barrel ammunition pezü, pump-action mortar ka aser country-made shells pongu densema liasü.

Old Gothol yimtsüng nung prangbong injang ngutetba dak sendakba nung nisung ka danga pua mali, saka item prangbong injangtem ya ken o dak sendaka aliba police station nem bendanga agütsüogo.

Ketdangsürtemi ashiba agi, ken o ajak nung apurtem aser parnok ket nungi ngutetba osettem police stations balala nem bendanga agütsüogo.

POTENTIA RESIDENTIAL

"Exclusively For NEET Aspirants"

NEET 2026
CRASH COURSEClasses start from
6th March 2026

- * COMPLETE REVISION - PHYSICS, CHEMISTRY & BIOLOGY
- * MOCK TESTS & EXAM-FOCUSED PRACTICE
- * EXPERT FACULTY & PERSONAL MENTORING
- * PEACEFUL RESIDENTIAL STUDY ENVIRONMENT

17th years of Consistent Neet Result

9862032828

7005657885

 Khadiruzha Ward 1
Chumoukiedima
ADMISSION
OPEN

Iran-i Khamenei asüpila sentong thinen, Israel-i pa melener tepsettsü amokmeren

Tehran, Metsüremi/March 04 (Agencies): Iran indang lenir asür Supreme Leader Ayatollah Ali Khamenei bilemteta Tehran nung sentong agitsü aliba thinenogo, ta Iran indang Tasnim news agency ajanga ashi, shiba Israel aser United States nati lungjemer tayimtsü amshia amakdang par kinunger den külemi tepseta liasü.

Inyakyim kar nung mepetmesü aliba ajanga menur ta ketdangsur kati ashi aser yangji provinces balala nung aliba nüburtemi iba sentong nung adentsü mepishiba dena lir.

Asüpila sentong tang yangluba mapang lir aser nisung jeti adentsü imlar, saka lokti adenshia mang ayimba mapang US-Israel nati amaksü akok ta tebilemtsü lir. 1989 küm Ayatollah Ruhollah Khomeini asüpila sentong nung nisung million ter shi dena liasü.

Iran indang Islamic Propagation Council tekolakba Hojjatoleislam Mahmoudi-i asüpila sentong ya Tehran nung aliba Imam Khomeini Prayer Hall nung

nikongdang 10:00 ako nungi tenzüksü aser anogo asem alitsü ta shir ghonda ishika lir iba osang ya arur.

Khamenei ya Honibarnü tepset, aser pa arishi küm 86 liasü. Pa ya Khomeini melena Iran indang supreme leader ka ama 1989 küm nungi inyaka aru.

Iran indang supreme leader ya sorkar indang kongsang ajunga, military aser judiciary nung tematiba tashi bena lir aser linük indang tanüla tsütsüa lenir ka ama inyaker.

Ayatollah Ahmad Khatami, shiba Iranian cleric tanishir aser tashi tulu aliba Guardian Council aser Assembly of Experts nung züngsem ka lir, pai asür Khamenei melentsü nübu teshimteter lir ta ashi.

"Supreme Leader tekeratiba nung shimtsü, tatemleni arur, ajisüaka linük nung tensa ya rara tensa ka lir," ta Khatami-i state TV dang ashi.

Assembly of Experts nung züngsem 88 ya nüburtemi küm ti nung khen shimer. Assembly atema toktepba candidates tem ya mezüing Guardian Council ajanga shima agizüksüla. Guardian

Council ya tentet tesashi ka lir aser yangji züngsemtem shimba nung supreme leader shilema lir.

Supreme leader ka shimtsü atema simple majority nüngdaker. Candidate ya senior jurist ka asütsüla aser Shia Islam indang jurisprudence kanga junga meteta alitsüla aser pa dak political judgement, tasü tait mulungsentsü aser administrative tashi alitsüla, ta Iran indang constitution ajanga ashir.

Khamenei indang jabaso tanabuba Mojtaba Khamenei ya tebu melentsü asoshi tokteper rongnung ka lir.

Bodhbarnü Israel indang Defense Minister Israel Katz-i Khamenei melentsü shimba Iran lenir shiba südir süaka tepsettsü ta amokmerenogo.

"Israel raksatsütsü, United States, free world aser region nung linüktem amokmerena Iran nüburttem ajemrepa ayuba sentong maneni inyaksü asoshi Iranian terror regime-i lenir shiba shimdir shimaka, shiba südir süaka mesüra pa kong atsükdir atsükaka tepsettsü," ta Katz-i social media X nung ashi.

Trump-i amokmerenba Spain Ato Kilonser Sanchez-i aitsü



Madrid, Metsüremi/March 04 (Agencies): US Tir Donald Trump-i Spain den shishilempaba tembangtsü amokmerenba Spain Ato Kilonser Pedro Sanchez-i khenyong magizük aser rara anemba nenshia ashi aser international law raksaogo ta shia liasü.

Television nung minute ter jembidang Sanchez-i Ukraine aser Gaza nung rara aliba bilemtet aser küm 20 jakdang Iraq War athishia liasü aser Spain sorkar meraratsü tangatetba nung lir ta ashi.

Moron aser Rotafor nung linük ana külemi amshiba bases Iran amakba nung amshitsü asoshi US nem memelaba yong Trump-i Spain den shishilempaba kecha malitsü amokmerena liasü.

Mongulbarnü German Chancellor Friedrich Merz den senden ka amendang, "Spain kanga majung," ta Trump-i shia liasü.

"Onoki Spain den shishilempaba ajunga rakdangtsü. Onoki Spain den kecha meinyakner," ta pai ashi.

Spain ya Nato nunga "terrible partner" ka lir, kechiaser parnoki defence budget timba makumer, ta Trump-i tai tongloktsü. Küm tetenzüklen Venezuela telungi US mitkar aiba anema Sanchez-i aitsüba asoshi Trump jashia liasü.

Madrid nung ato kilonser aliba La Moncloa tesem nungi television nung jembidang, rara ajanga Spain nunger dak kongshiba atema rongsenketzüng tsütsü mera agitsü asoshi sorkari shisadangtar ta Sanchez-i ashi.

Spain indang Socialist ato kilonseri Ukraine aser Gaza nung sorkar tangatetba den kasa lir ta rasaa ashi. 2023 küm Hamas-i amakba nung Israel mitkari telangzüba agütsüba atema Sanchez-ia kanga sashia anema nokdaka liasü.

Europe nungi Gaza nung rara anema kanga sashia jembiba sorkar rongnung Spain ya ka lir, aser Israel inyakyim ya "genocide" lir ta ashi aser EU züngsem aikan dang tema Palestinian linük alitsü parnoki mulunga agizüka liasü.

2003 nung Iraq amakba nunga nükjidong matalok aser nüburttem takum tamajungba akum, aser Iran amakba ajanga nisung million aika rongsenketzüng nung kasaji kongshitsü, ta ashi.

Pai Iraq amakba indang athishiba ajanga Spanin nunger aika den sendakteptsü. Iba mapang Spain indang conservative People's Party sorkari bhukumba ajanga rara anema longkak aita liasü. Aser iba yongji March 2004 nung Socialist Party-i aoksa election nung takok angutsü mapa tenzüka ta amanger.

US aser Israel nati Iran tesashiba amaker, rara agi region süngogo

Tehran, Metsüremi/March 04 (Agencies): Iran tesem balala nung bomb pokloktsü aser Tehran-ia tayang kepzüka region nung tesem balala amaker. United States aser Israel nati Iran den rara tenzüker anogo pongu jungogo, aser tasüba timba akumer aser rara tatem kati arutsü teimla mangur.

Semiofficial Tasnim news agency ajanga Bodhbarnü Iran yimtiba tesem balala nung apokba ola angashiogo ta ashi, aser Iranian state television-ia central Tehran nung ki ka raksar aliba sayua liasü. Temeshi Qom yimti aser danga yimti aika nunga amak.

US aser Israel nati amakba nung nisung asüba

1,045 jungogo ta agency ajanga ashi.

International Atomic Energy Agency-ia Isfahan nuclear site anasa ki ana nung teraksa aliba ajiteter saka nuclear material aliba facilities nung teraksa mali aser tangbo radiological release mali ta ashi.

Bodhbarnü Russia indang Foreign Ministry-i Iran indang Bushehr nuclear power plant nungi kilometer ishika pilar US-Israel tayimtsü amshia amakba ajanga iba tesem ya timtem nung lir ta ashi.

Israel linük tesem balala nung air raid sirens tem ola adoka liasü aser nüburttem tejenokdak tesemtem bushia ao, aser Iran nungi missile

khaloktsüba khazüka yoktsü merandang ola tulu adoka poka liasü.

Bodhbarnep Israel-i nüburttem dang Iran nungi missiles khaloktsüogo aser defence systems ajanga itemji raksatsütsü mapa inyaktar ta shia nüburttem dang jenokdak tesem bushia aotsü tuyua liasü.

Jenoktsü totuyuba ya Jerusalem, Tel Aviv aser linük tesem balala nung agüja liasü. Ajisüaka Israel indang emergency medical service, Magen David Adom-i nisung asü-amaba osang mali ta ashi.

Israel mitkar temia ghonda ishika jakdang Iran nungi missile khaloktsüba osanga prokshia liasü.

Tehran-i Israel aser Gulf linük balala nung tayang kepzüka missile aser drone amshia amakba manener, aser US Tir Donald Trump-ia rara ya ita kashi alitsü ta shiogo.

Bodhbarnü Tehran nung ola tulu adoka apokba liasü, kong Iran sepaitem dak tenük yoker amak ta Israel mitkari ashir.

Parnoki Basij den sendaktepa aliba ki balala nung amak ta ashir, koba Iran indang Islamic Revolutionary Guard Corps (IRGC) indang all-volunteer force lir.

Israel mitkari Iran indang internal security command den sendaktepa aliba ki nunga amak ta ashir, shirnoki taoba

mapang longkak aiter tashiyim amshia azüoka liasü.

Ceasefire alitsü teimla khenyongi mangur aser Bodhbarnü Iran Foreign Minister Abbas Araghchi-i Trump kanga sashia aija pai diplomacy aser pa shimba America nunger külakoktsüogo ta ashi.

"Kanga tepenja aliba nuclear ken o jembishinü real estate transaction ka ama amshidang, aser tiazü agi ochi meketbanger alidang, asangsang masüba teimla kodanga ochi makumtsü," ta pai X nung ashi.

"Tajangzükji kechi? Tesempa agi jembishinüba langpang nung bomb pokloktsüba."

T20I rankings: Farhan-i tera agi dang Abhishek memenepi lir



Abhishek Sharma

Sahibzada Farhan

Metsüremi/March 4, 2026 (Agencies): Bodhbarnü sayaba ICC Men's T20I batting rankings nung Pakistan nung opener Sahibzada Farhan jenjang kanga junga kuma pai temaba jenjang nung alisang India nung Abhishek Sharma tera agi dang memenepi lir.

ICC Men's T20 World Cup 2026 nung kanga junga asayaba sülen Farhan ya tanabuba jenjangi tuogo. Farhan ya T20 World Cup ka nung century ana yangluba mezüngbuba cricket asayar kümogo. Pai Sri Lanka den Pallekele nung Super 8s tatembangbuba asayaba mapang tanabuba century yanglua liasü. Iba asayamung nung kanga junga asayaba ajanga pa rankings nung jenjang ka tejakdangi atuba dang masü saka iba ya pa

indang career nung rating tajungtiba lir.

Abhishek Sharma maneni temaba jenjang nung lir aser point 26 agi timba lir. Pakistan nung batter yagi rating point 848 ngua Englad nung asayar Phil Salt ajatetogo. Pai World Cup nung run 383 yanglua liasü.

Kasa mapang nung India nung asayar Ishan Kishan-a pezüububai tuogo aser Tilak Varma trokbuba nung lir. South Africa nung asayar Dewald Brevis-a jenjang ka tejakdangi tua tang tibuba nung lir.

Batter tem rongnung Zimbabwe nung asayar Brian Bennett-a jenjang kanga junga kümogo. Pa jenjang trok tejakdangi tua tang 11buba nung lir South Africa nung asayar Ryan Rickelton aser Aiden Markram nata 13 aser 16buba nung lir.

T20I bowling rankings nung India nung spinner Varun Chakravarthy maneni temaba jenjang nung lir. Pai WC nung tang tashi nung wicket 12 agir lir, saka pa Pakistan nung Abrar Ahmed-i temeneper dang lir.

Bowler tem rongnung Jasprit Bumrah tenetbubai tuogo aser Arshdeep Singh-a 13buba tongtetogo. England nung bowler Liam Dawson 14buba nung lir aser South Africa nung pacer Lungi Ngidi 20buba tongtetogo.

All-rounder tem rongnung Zimbabwe captain Sikandar Raza maneni temaba jenjang nung lir. India nung asayar Hardik Pandya-i Saim Ayub ajateta tanabuba jenjangi tuogo. West Indies nung asayar tejen Jason Holder-a jenjang ti tejakdangi tua tang tibuba nung lir.

Bangladesh den ODI asayamung atema Babar meshim



Babar Azam

Metsüremi/March 4, 2026 (Agencies): Bangladesh den ODI asaya asem asayatsü aliba Pakistan team nung Babar Azam mezüngok. Asayar shimertemi taruba küm 50-over World Cup dak rangloker team yanglushitsü merangba mapang ka nung Babar toktsüogo.

India aser Sri Lanka na nung T20 World Cup junga masayateti semifinal-a metongjungi tsükatokba sülen iba teletetba ya agia liasü.

Babar-i T20 WC nung jung

masayatet aser run 91 dang yanglua liasü. Pa tang junga masayateaka pai ODI nung kanga junga asaya aruogo, anungji pa meshimba ya kanga tongtibang teletetba ka lir. Pai ODI asaya 140 nung run 6,501 yanglua lir kong century 20 densema lir.

Pa den külemi opener Saim Ayub, all-rounders Shadab Khan and Mohammad Nawaz, aser fast bowler Naseem Shah nungera asayar 15 shimba nung densema mali.

Pakistan team shimertemi tang linük team nungi khen danga masaya aliba asayar trok shimogo. Asayatem ya Abdul Samad, Maaz Sadaqat, Muhammad Ghazi Ghorri, Saad Masood, Sahibzada Farhan aser Shamyul Hussain nung lir.

Linük ana tsüngda ODI asem ya March 11, 13 aser 15 nü asayatsü aser iba ajanga asayar tasentem nem international jenjang nung asayatsü asoshi maongka agütsü.

Kasa mapang nung Fakhra Zaman T20 World Cup mapang hamstring yiruba sülen meshim.

Fast bowler Shaheen Shah Afridi lenisüba nung team asayatsü ta Pakistan Cricket Board-i metetdaksüogo.

Taruba küm ODI asayamung October ita South Africa, Zimbabwe aser Namibia nung asayatsü renemba mapang Pakistan-i tang team tasen ka yanglutsü asoshi asayar tasentem tendang tenzükgogo.

Middle East nung ACL asayatem thinener

Metsüremi/March 4, 2026 (Agencies): Middle East nung taruba hopta Asian Champions League nung asayatsü aliba asayatem mapang telatet ka makai thinenogo, ta Asian Football Confederation (AFC)-i Bodhbarnü sangdong ka ajanga metetdaksü.

Middle East nung tang rara tulu adoker aliba ajanga iba jenjang ya agitsüsa aküm, ta AFC-isa metetdaksüogo.

U.S. aser Israel nati Iran amakba ajanga Gulf nung linük aika dak kongshio aser alima nung mazüngtiba transit hub tem nung senzusenpong mejungi kümogo, aser iba ajanga asaya aika athitsüsa kümogo.

Asia antiolen taruba hopta Hombarnü nungi Bodhbar tashi

nung Asian Champions League Elite, Champions League Two aser third-tier Challenge League nung asayatsü aliba asayatem thinenogo, ta AFC-i metetdaksü.

AFC-i taoba mapang iba hopta Middle East nung Asian Champions League Elite round of 16 asayatem thinenja liasü, kechiyong Iran-i asaya ajak thitsü aser Qatar Football Association-ia linük nung football asaya ajak thija liasü.

"Asayar, team, ketdangsur, partner aser fan tem densema stakeholder tem ajak kümzüka toktsütsüji AFC asoshi tinyaksü tongtibangtiba lir, aser ajak kümzüka toktsütsü asoshi onok maneni bendanga agütsü lir, ta kasa sangdong ajanga metetdaksü.

Man United nungi asayar Jack Fletcher nem tenokdangba agütsü



Jack Fletcher

Metsüremi/March 4, 2026 (Agencies): Manchester United nungi asayar Jack Fletcher nem asaya trok atema tenokdangba agütsüogo. October ita Barnsley den EFL Trophy asayaba mapang o tamajung jembiba nangzüka sülen pa nem tenokdangba agütsüogo.

Arishi küm 18 tain midfielder shiba club nungi taoba mapang nungtugu asayar Darren Fletcher'er jabaso lir, pai tangar tiluja jembiba atema Football Association-i temerenshi agütsüba agizükogo.

Asaya nung Fletcher-i, "nai kü indang aika meteta lir amaia, na ya gay-a na," ta tanga team nungi asayar ka dang asüngdangba sülen pa nem red card agütsü, kechiyong referee pa anasa liasü aser pai tena jembitepba ajak angashi.

"Mangatetep adokba mapang mekümdangi o jembiba atema kü dang tai tokang. Ni iba olen ya homophobic insult ka ama amshitsü tebilembabo

maliasü, saka iba amala oshi ya agizüksü makok ta ni meteta lir aser asaya tembangba sülen tatok meshio. Mebilemdangi jembiba olen ka ajanga kü tamangba aser jenjang mesayur," ta pai ashi.

Asaya trok atema tenokdangba agütsüba den Fletcher dang pound 1,500 senchi chiogo aser June 2 nü tashi nung FA education programme ka tembanga agütsü tetuyuba agütsüogo. Tetuyuba sülen manidakra pa suspend sütsütsü akok.

"Mezüngmeshi o jembiba aser iba ya kechiba lendong iba dak sendakba nung Jack tangatetba tashi itshidaksütsü atema Manchester United-i inyakogo," ta club-i ashi.

Fletcher taküm Premier League nung asemen asayaogo. Pa mezüngbuba asaya Aston Villa den asaya aser iba sülen Newcastle United aser Wolverhampton Wanderers na den asaya-a liasü.

BILEMDANGANG

"Teshisadangba melira tangazükba ajak amajok akümer."